



4<sup>e</sup> dim Pâques  
Paroisse Ste Marie – Camp Redjaf

Bandeko ba ngai ba bolingo

Bobotoooo... Bondekooo...

Lelo, Eklezia ya biso ezali bongo ko sepela lomingo la mineyi ya Paska. Lomingo loye lobengami **Lomingo la Mokengeli Molamu** : *Yezu Kristo ye nde Mokengeli Molamu*. Nazali na esengo e nene na koya ko sambela na bino bana ba ngai awa na Paroisse Ste Marie ya Camp militaire Redjaf ; na camp eye, boyebi, nakulaka ki Episkopo, mibu mineyi mileki. Esengo pe po bayike kati na bino bako kula sakramento ya Nkotisa, na tina ete bayamba Elimo Santu, oyo ako lakisa bango kovanda bob ana ya Nzambe.

Bandeko ba ngayi ba bolingo

Na litangi lya yambo, o buku ya Bikela bya Bapostolo, toyoki motuna monene bato batuni na Petro na bapostolo, na sima ya mateya ya Petro : ***Bandeko, tosala nini?***

Wana ezali motuna esengeli tomitunaka tango inso tozali koyoka liloba lya Nzambe : Awa nayoki liloba, nayoki mateya, nasala nini po na bomoyi na nga, nasala nini oyo ekoki ko sepelisa Nzambe kati na ngai. Petro pe ayanoli : *Bobongola mitema. Boyamba Yezu. Bolongwa o molongo mwa baye babungani. Boluka libiki.*

Lolenge Santu Petro akomi na mokanda mwa mibale batangeli biso: Na kuruse, Yezu ayokaki mpasi, zambi amemi masumu ma biso mpo te tokoka koboya masumu mako yela biso liwa, mpe tokoka kozala na bomoi na ezalela ya bosembo. Po lisumu yango nde ekomemaka moto na banzela ya mabe, ya bosoto, ya liwa.

Yezu Kristo azali Mokengeli Molamu mwa mpata. Bisu nde mpata ya Nzambe. Makambo mazali masato maye azali kolakisa biso na lomingo loye:

Ya yambo, Yezo alobi : ***Mpata ekoyoka mongongo ya Mokengeli, pe mokengeli ako benga mpata ya ye yoko yoko na nkombo ya yango***: Ndeko na ngayi, Yezo Kristu ayebi yo na nkombo na yo; yokaka se mongongo ya Nzambe, Liloba lya ye. Fongola motema na liloba ya Nzambe. Tolobaka yango ete : *Oyo azali na matoyi ya koyoka... a yoka....* Salela yango: matoyi ma yo mafunguama na koyokaka maye liloba lya Nzambe ezali kolakisa biso na mateya ya ba Nganga Nzambe pe basali ya solo ya Ye.

Ya mibale, Yezo alobi : ***Mpata akolanda mopaya te, kutu ako kima ye*** : soki ozali mukristu ya ecclesia ya biso pona nini koluka ko kende na ba mangomba misusu ? Mpo na nini koluka ko landa ba pasteur misusu? Yezu Kristo azali ko kebisa biso na miyibi, miyibi ya milimo mya biso; kokebisa biso na mibebisi, mibebisi ya bomoi bwa biso; azali ko kebisa biso na baye bazali bakengeli ba solo te : bazali koteya kaka po na mosolo, po na lokumu ya bango mei.

Ya misatu, Yezu alobi : ***Ngai nazali ezibeli ya lopango ya mpata.***

Yezu nde akotisaka biso na bomoi bwa Nzambe. Soki ozali na Kristu te okoki kozala na nkembo ya Nzambe te. Yezu Kristo nde akotisaka biso na bolingo bua solo, akotisaka biso na bwanya bwa solo, akotisaka biso na bomoi bua solo.

Bino bana ba ngai baye boko zua sakramento ya Nkotisa, Elimo Santu ako kitela bino po ete boyamba makabo manso ma ye : bosolo, bosantu pe bolingo. Boko ndima kotika zabololo na bikoseli bya ye, na bikelakela bya ye binso, mpe bokasola boyambi bwa biso na Eklezia Katoliko.

Mokolo moye mozali mpo na bino, mokolo monene na kati ya bomoi bwa bino. Bo mipesa na Yezu Kristu seko. Bo tingama na nzela ya boyambi bwa biso. Bo salela liloba lya Nzambe. Bo kula ba sakramento ya Eklezia mingi penza sakramento ya Ntubela na ya missa to komunio. Bo landa nzela ya makambo mabe te, botala Yezu Kristu Mokengeli molamu, solo ye ako kengela bino na ngonga ya pasi pe na tango inso.